




# MUSIC

Tobias Luchsinger:  
Gsang & Rhythmusgitarre  
Filip Auf der Maur:  
Leadgitarre & Chörli  
Timo Crivelli:  
Cajón, Melodica & Chörli

Mit em Boni Koller als Papi im  
«Fernsehluuge» & em Jeannot Steck  
im Chörli bi «I de Badi», «Luusbueb»  
& «Autofrei».



## I DÄ BADI

Am morge stahni ganz früeh uf  
Tuen e tonne sunnecrä m uf  
Ich gahn i d'badi  
Ich gahn i d'badi

Bim igang chumi a de schlange verbii  
Dänn ich has saisonabo debii  
Bin i de badi  
Bin i de badi

Ich find mini fründe bi de  
ping pong tisch  
Sie sind pflutsch nass wie en fisch  
Ich rüehrs tüechli anne und ränne los  
Gump in see schwümm diräkt zum floss

Ich liebe d'badi (*sächs mal*)

Vom sprungturm schupfi d'Miley in see  
Oops das hät de badmeister gseh  
Schimpfis i de badi  
Schimpfis i de badi

So schnäll wies gaht ränni weg  
vom gscheh  
Zum kiosk ich bruch es glacé  
Chröml e i de badi  
Chröml e i de badi

Glücklich schläki am glacé ume  
Plötzlich ghöri es lästigs summe  
Es gäls schwarzes fiises wäspi  
Freud sich ufes glacé fäschtl i

Ich hasse wäspi (*foif mal*)  
Aber ich liebe glacé

Zrugg bim tüechli hängis stundelang  
I de sunne umenand  
Blöderwiis hebt sunnecrä m  
Nöd so lang ich han en sunnebrand

S'isch mer egal (*foif mal*)  
Ich liebe d'badi

# FEERIE

Hüt am morgo zum  
letschte mal ufgstande  
I de mathi scho wieder nüüt verstande  
Jetzt no durehebe bis zum mittagässe  
Und dänn channi ändlich alles vergässe

Dänn ich han...

... Feerie!  
Summerferie!  
Foif wuche nüüt z'tue  
Und ändlich miini rueh

Jetzt chani use und mache was ich will  
In wald go spiele, go  
bade, ach es git so vill  
Spaht is bett und am mor-  
ge eifach nöd ufstah  
Ach ich wünschti de summer  
wür für immer wiiter gah

Feerie!  
Summerferie!  
Foif wuche nüüt z'tue  
Und ändlich miini rueh

De wecker lüütet am 7i und de  
papi rüert mich usem bett  
Verschlafe schell ich mich us de  
decki obwohl ich das gar nöd wett  
I de schuel isch d'frau Müller scho voll

parat und ich scho wieder vill z'spaht  
Allei scho s'ufstah isch en riise kampf  
und jedi prüefig en cheibe chrampf

Zum glück sind bald scho wieder...

Feerie!  
Herbstfeerie!  
2 Wuche nüüt z'tue  
Und ändlich miini rueh



# LUUSBUEB

*De stadtrand vo züri. Und z'mitzt drin  
es chliises huus. Mit emene genervte  
papi und emene genervte mami.*

Luusbueb häsch scho  
für d'schuel glernt?  
Lueg der diin brüeder a, de hät  
i de mathi en 6er kha (und in  
französisch en 5ehalber)  
De Herr Prelicz hät mer gseit,  
dass immer ischlafsch  
Das chunnt vom heimlich un-  
der de bettdecki läse

luusbueb

Ich wott, dass du is bett gasch  
Am morgge pünktlich ufstahsch  
Rächtzigtig i d'schuel gasch  
*Was söllled d'lehrer säge?*  
Und döte richtig mitmachsch  
Am lehrer nüme driquatschisch  
Ständig so en lärm  
*Was söll de lehrer säge?*  
Nach de schuel nöd no go chröml  
Chum mal pünktlich hei

Oh Mami. D'Ufzgi sind mer z'blöd.  
Es isch eh scho z'spaht drum  
machis eifach nöd  
Ich ha mich eh scho immer meh für de

Sandchaschte interessiert  
Döfi nöd chli länger spille, Mami?

Isch doch egal wie ich usgseh  
Mit löcher i de Hose  
Ich mach doch so gern lärm  
Ich singe frächi lieder  
Ich strüfte mit miim Brüeder  
Chlaus lego vo de gspönl  
*Egal was d'eltre säged!*  
Nach de Schuel gahn ich go chröml  
Chum halt chli spöter hei

Und mir sind all so frächi Chind  
Und mir sind all so frächi Chind  
Und mir sind all so frächi Chind  
Mir sind halt fräch

Ich und mini Fründe  
Händ hüt scho alli gloge  
Und mached so gern lärm  
*Was söll de nachbar säge?*  
Uf niemerd wämmer lose  
Mir händ kei angst vor grosse  
Die hämmer eh nöd gern  
*Was wänd dänn die euis säge?*  
Doch jetzt händs euis ufs dach gäh  
Und das hät richtig weh tah

Mami hilf mer bitte!





## FERNSEHLUEGE

Oh yeah  
Ändlich wieder wuchenänd

Samstig morge, bin scho am 7i wach  
De räge prasslet mit vol-  
ler wucht ufs dach  
Ich lueg use alles grau  
So wottis genau

Mami und Papi ligged no im bett  
Das isch genau döt wo ich sie wett

Ganz lislig schliichi dur de gang  
Weiss bini z'luut gahts nüme lang  
Dänn s'mami wacht vill z'liecht uf  
Ich hoff miin plan gaht uf

Ich stah i de stube mit em grätli i de hand  
Ändlich richtis uf de  
bildschirm a de wand  
Ufgregt suechi mini liebblingssändig  
Hüt ischs Sponge Bob doch  
das wächsled ständig

Jetzt chani Fernsehluége  
Hoffentlich de ganzi Tag  
Zappe durs programm  
S'git so villes wohni mag

Video für video ziehni mir ine  
Pauselos am dure streame  
I dem momänt fangt d'sunne a schiine  
Plötzlich chunnt de papi inne

Jetzt muessi usegah  
Es schisst mi grausam a  
Aber da gsehni de Kerim stah

Gireitzli riite, purzelbäum mache  
Fangis spille und zäme lache  
Näbedenand uf de wiese am chille  
Und d'gschichte vom  
liebblingsfilm nahspille

# SO WIE FRÜEHNER

Wie jede morgue stahni vor diim huus  
Lüüt a de tür und lueg zum fänschter ue  
Du strecksch diin chopf use  
und grinsisch mich ah  
Und seisch: *«Ich chume grad.  
Bliib doch no churz dah.»*

Gschwind wie de wind  
gömmerr i d'schuel  
Und wie immer hocksch du näbed mir  
Wänn mal nöd schwätze döfsch,  
schriibsch du mir es zäteli  
Uf dem stah: *«Ich wott  
für immer bi dir sii»*

Mal wieder lüüti bi dir  
Doch das mal wotsch, dassi ufechum  
Mit truurigem blick emp-  
fangsch mich a de tür  
Und seisch: *«Mir ziehnd wäg.  
Züri isch für euis z'tüür.»*

Alleige gahni ich d'schuel  
De platz näbed mir isch ganz verwaist  
Ich chumme hei und gsehn e  
poschtcharte ufem tisch  
Die isch vo dir und du schriibsch:  
Wie sehr du mich vermissisch

Min papi hockt zu mir an tisch  
Wüscht es tränli us miim gsicht



Er seit zu mir: *«Marburg isch  
nöd so wiit wäg.  
Bald sind Feerie, wieso gömmerr  
nöd döt hii?»*

Tod müed stiigi usem bus  
Du stahsch döt und strahlsch mi a  
Die Feerie gönd wie im flug verbii  
Du bisch immer no die glich, doch ganz

wie früehner wird's wohl nüme sii  
Wird's wohl nüme sii  
Wird's wohl nüme sii, sii, sii  
Du bisch immer no die glich doch ganz  
wie früehner wird's wohl nüme sii

## S'CHLINE MEITLI UND DÄ WOLF

Amene namitag sitzt en grosse wolf  
Im dunkle wald und au scho bald  
Chunt es chlises meitli verbii  
Sie hät en chorb vollä ässe debii

Bringsch du de chorb zu dim grossi?  
Frögt de wolf s'chline meitli  
Sie seit ja und laht in stah  
Doch de wolf weiss genau wo dure gah

Wo s chline meitli bim grossi achunt  
Lit öper da im pjyama,  
Sie macht drü schritt und dänkt au mit  
Das isch de bösi wolf «Oh shit»!

S chline meitli isch so schlau  
Wie en wolf usggset weiss sie genau!  
S chline meitli isch so schlau  
Wie en wolf usggset weiss sie genau!

Weiss sie genau ...  
S'Meitli packt ihres lasso us  
Bindet de wolf an baum vorem huus

Jetzt mues er in züri zoo ga  
Und wird's chline meitli in rue lah!

S chline meitli isch so schlau  
Wie en wolf usggset weiss sie genau!  
S chline meitli isch so schlau  
Wie en wolf usggset weiss sie genau!

## SCHNEEBALL SCHLACHT

Am morge früeh bini verwache  
Lueg use, alles volle schnee  
Freudig pack ich mini sache  
S'hät zwänzg zentimeter oder meh,  
genau so will ichs gseh

Ersti stund scho wieder mathi  
Ich chann nöd lose wägem schnee  
S'eimaleis wott hüt nöd ände  
No foif minute das chas doch nöd sii,  
ändlich lüütets ich ränn uf de pausi

D'Schneebölle flüged chrüz und quer  
Eine trifft mich, weiss nöd wo her  
De Timmy grinst usser rand und band  
Ich schüsse zrug, doch de bölle  
zerbricht mer i de hand

Timmy die ersti rundi gaht a dich  
I de stund grinsisch du mich a  
Lach du nur, es isch mer glich

Ich weiss scho wie ich dich cha schlah  
I de nächste pause chunnsch du drah

Ufem pausi stahni bi de sächstklässler  
Du gsehch mich allei und packsch  
die glägeheit bim schopf  
En gezielte ball, doch ich duck mich wäg  
Diin bölle trifft de Nick us de  
sächste klass am chopf

Vor schreck erstarrt  
luegsch du zum Nick  
Hässig dreht er sich zu dir  
Z'Füfte chömmeds uf dich  
mit bösem blick  
Vo chopf bis fuess schneebeleds dich ih,  
Ich glaub die rundi gaht a mich

## AUTOFREI

D'Glocke lüüte d'stund isch uus  
Ich ränne usem schuelhuus  
Stiege uf mis velo  
Und düse ändlich los

I de einbahnstrass  
Gits de zweibahnspass  
Mit em velo durs quartier  
Sogar im chreis vier  
*sogar im chreis vier*  
Sind am tshutte uf de strass  
Da stinkts nach abgas  
Ich ghöre scho wies brummt



De nuggipanzer chunnt  
*de nuggipanzer chunt*

Mir mir mir mir  
Wännnd doch nur chli  
Tschute tshutte tshutte tshutte  
Uf de strass  
Ich wünsch mir e leeri strass  
Mir hettet so vill spass  
Rose und garte  
Statt rosegartestrass



Sie mached en huere lärm  
Und bruuched z'vill platz  
Autos schadet au am klima  
Euisem gröschte schatz

Drum nimi jetzt mis velo  
Und hole mini fründe  
Zäme fahre mer zum rathuus  
Euisi botschaft go verchünde  
*euisi botschaft go verchünde*

Mir mir mir mir  
Wännnd wännnd wännnd wännnd  
Züri Züri Züri Züri  
Autofrei

# SCHOGGI BANANEPÜREE

Lokifüehrer, badmeister, pilot  
und buschauffeur  
Isch alles zimli lässig, doch  
findet bi mir keis ghör  
Bürogummi, automech  
isch mer alles z'blöd  
Für fuessball bini z'langsam  
au das wotti nöd  
Ich wott nöd banker werde  
und scho gar nöd polizist  
Bin kein azugträger uniforme findi trist  
Ich wott nöd banker werde  
und scho gar nöd polizist

Wott nur no glacé ässe  
alles anderii isch mist

Schüeler sii isch nüüt für  
mich bin lieber en rebell  
Wo tuet und laht was er  
will, wie de wilhelm tell  
Im wald go spille fürli mache  
gfallt mer doch vill meh  
Zum ässe gits es schlangebrot  
mit schoggibanapüree

Ich wott nöd banker werde  
und scho gar nöd polizist  
Bin kein azugträger uniforme findi trist  
Ich wott nöd banker werde  
und scho gar nöd polizist  
Wott nur no glacé ässe  
alles anderii isch mist

Mathiprüefig, ufsatz schriibe,  
cha mer alles gstolle bliibe  
Lieber chli go bädele, d'limmat abetriibe  
Schaffe tueni nöd so gern,  
bruuch doch nöd vill gäld  
S'git anderi wos meh chönd  
bruuche uf dere grosse wält  
Ich wott nöd banker werde  
und scho gar nöd polizist  
Bin kein azugträger uniforme findi trist  
Ich wott nöd banker werde  
und scho gar nöd polizist  
Wott nur no glacé ässe  
alles anderii isch mist



# SAND- CHASCHTE

De sandchaschte ghört mir allei  
Da cha keine inne nei  
Au nöd de noi usem block  
Bliib doch i dim zächte stock

Er gseht ja au so andersch uus  
Da chum ich scho lang nüm druus  
Was er redt verstahni nöd  
Drum find ich in jetzt scho blöd

Am mittwuch nammi nach de schuel  
Wott ich bim spille mini rueh  
Doch wer hockt da uf miim thron  
Git das öppe e revolution

Unschuldig hockt er da  
Es lächle uf de lippe gha  
Gah doch zrugg wo d'hercho bisch  
Das wüschd ihm s'lächle  
vo siim gsicht

Stopp was hani da jetzt gseit?  
Ha ja gar nöd überleit  
Nur will er chli andersch isch  
Hocki nöd an gliiche tisch?

Debii känni ihn nöd mal  
Wo er herchunnt isch doch egal

Händ hüt de ganzi tag verbracht  
Am abig gits bi ihm no z'nacht  
So fein han ich no nie gässe  
De abig wirdi nie vergässe

Er isch miin neue beste fründ  
Au wänn die andere blöd tüend  
Ich zeig ihne, dass es egal isch  
Wänn eine chli andersch isch

Zum glück hani das jetzt gseit  
Hani ändlich überleit  
Grad will er chli andersch isch  
Hocki jetzt am gliiche tisch

Und er zeigt mir neuu sache  
S'git so vill wo mer no chönd mache

# GEMEIN

S'isch s'thema nummer eis  
Ich bin richtig heiss  
WM Final  
Mis team gaht richtig ab  
Wer stellt de fernseh ab  
Muess is bett

So gemein, so gemein

Sitze ganz allei  
Niemerd isch diehei  
S'isch so langwilig  
Mis zimmer isch mis gfängnis



De pfnüsel mis verhänginis  
Döf nöd use

So gemein, so gemein,  
so gemein, so gemein

Ich wott jetzt ändlich use  
Ha nämlich gnuag vom pfuse  
Bind doch nūme chränk  
Wott kein huestetee  
De hani langsam gseh  
Ha gnuag vo de summergripp

Es gaht mer wieder guet  
Ich suech min sunnehuet  
Bin wieder da, stahne vor mim huus  
Was gspüri da o gruus, s'fangt a tröpfle

So gemein, so gemein,  
so gemein, so gemein

Ich hocke i mim zimmer  
Doch das mal ischs vill schlimmer  
Bin doch wieder gsund  
Räge gahn verbii  
Bin gnuag lang dinne gsii  
Wott doch nur chli usegah



## PAPI CHUM ZRUGGI!

Sie lauft dur de schummrig wald  
De isch gruslig und chalt  
Links und rächts raschleds im gebüsch

Sie chunnt zunere dunkle höhli  
I dere drin isch d'fee  
Es isch so finster, d'Luna cha nüt gseh

Tüf i de höhli fangts a lüüchte  
Trotz ihre angst gaht sie druf zue  
D'Luna gseht die alti fee  
Die luegt s'meitli a in aller rueh

Wo diin vater isch, chani dir nöd säge  
Seit d'fee und lüchtet grūen  
Er hät mini chrütli gno  
Isch druf uf und devo  
Ufe diräkt zum adlerhorst

Dänn gib mer vo dine chrütli  
Seit d'Luna und funkled d'fee bös a  
Ich suche jetzt miin papa  
Dänn i wott ihn wiederha

Sie flügt dur die chalti luft  
Under ihre s'dorf ganz chli  
Geschwind erreicht sie de adlerhorst  
Und redet döt mitem Adlerpapi Georges

*Adlerpapa, Adlerpapa...*

De Adlerpapi isch zimli hässig  
Wägem mänschemeitli  
Sie stört sin mittagsschlaf und  
benimmt sich gspässig

Sie fasled vo ihrem papi  
Und vomene zauberchrütli  
Jetzt flügt de höch obe i de luft

Am stolze Vogel tuets  
mänschemeitli leid  
Hät er sälber ja drü adlerchind  
Er schüttlet sis fäderchleid  
Luegt das sie ihre papi wieder find

Zäme flügeds dur die chalti luft  
Tochter und papi sind wieder eis  
So chönntis ewigs wiiter geh  
Doch irgendwänn ändet  
au die schönsti reis



D'Luusbuebe sind dä Tobias Luchsinger,  
Timo Crivelli & Filip Auf der Maur. Ehrelu-  
usbueb Kerim El Mokdad. Ufgnoh vom Je-  
annot Steck im Soundcheck Recording &  
Producing Studio, Bachenbülach. G'Mas-  
tered vom Dan Suter, Echochamber Stu-  
dio. S'Artwork isch vom Nando von Arb:  
[www.nandovonarb.ch](http://www.nandovonarb.ch). Es grosses Danke-  
schön an Jeannot, Dan, Nando & Boni Kol-  
ler. Danke Nuria, Yaro, Milo & Juna Weber,  
Inke Groß & all euisne Familie und Fründ\*in-  
ne, wo eus immer so toll unterstützt und  
a eus glaubed.

In Erinnerung an Detlev von Uslar  
& a d'Christine Maria Neunhäuserer

